



Cusseglier guvernativ Christian Rathgeb flancà da dus giuvens da la Cumpagnia da mats Domat.



Chant da vaglia dals dus chors da baselgia Domat e Panaduz.



Cusseglier guvernativ Mario Cavigelli (a san.) cun Erich Kohler, il president da la vischnanca Domat.



Reto Loeffle, il president communal da Razén, cun Tina Gartmann-Albin, la presidenta dal cussegl grond.



Tut ha d'esser perfetg er tar ils tamburs da Domat.



Plevons, preditgants e preditgantas cun intgins mats da la Cumpagnia da mats Domat.

FOTOS G. N. STGIER

«Esser uschè liber sco in capricorn»

Festa tschientenara dal Signuradi da Razén

DA GION NUTEGN STGIER / ANR

■ La libertad da quels da Razén avant 200 onns è stada en il center da l'act da festa ier dumengia en la tenda en vischinanza dal chastè. Ina messa ecumena impressiunanta, pleds da bun cuntign, chant da vaglia ed ina gronda raspada ch'è vegnida per festivar quel giubileum. La davosa fin d'emna èn la vischnanca da Razén ed ils lieus vischins stads en luna da festa. La raschun è stada che la populaziun da Razén e da las vischnancas vischinas han festivà il giubileum da 200 onns libertad dal Signuradi da Razén. L'act festiv en preschientscha da blera prominenz politica ha sveglià l'interess d'in grond public.

Strusch da s'imaginar

Cumenzà ha l'act da festa cun ina messa ecumena celebrada dals plevons, preditgants e preditgantas da Razén e dals lieus vischins Panaduz, Tumein, Domat e Favugn. La libertad è lura er stada il fil cotschen dals pleds ch'ils plevons, ils preditgants e las preditgantas han duvrà durant la messa ecumena plain dignitad. Oz ins na sappia strusch s'imaginar tge mument che quai saja stà avant 200 onns cura che quels da Razén sajan daventads ina part dal Grischun e libers da l'imperi austriac. Quel plaschair, quel sentiment, quel temp e quel desideri sa lascha cumparegliar cun la libertad d'in capricorn, è vegni ditg dal cult divin ecumen. Dieu pensa e maina, e gist uschia saja er stà avant 200 onns cura che Razén saja daventà independent da l'imperi austriac. Il vestgi da festa a la messa ecumena han dà ils dus chors da baselgia da Domat e da Panaduz sut la direziun da *Cornelia Meier Eckstein*, accumpagnads a l'orgel



Ils motivs per far fotos n'han betg mancà.

da *Pieder Jörg*. Cun vuschs sonoras e claras han las 40 dunnas ed umens interpretà il Gloria ed il Sanctus or da la «Spatzenmesse» da Wolfgang Amadeus Mozart ed autras chanzuns sacralas da melodia plain sun e tun.

In mument singular

Beneventada è la raspada vegnida da *Pierino Casutt* da l'Uniun festa tschientenara Razén. Represchentà la regenza grischuna ha cusseglier guvernativ *Christian Rathgeb*. Sco vischin da Razén saja el vegni cun plaschair a l'act festiv. En ses pled ha el lura er ditg ch'il 1819 saja il Grischun stà ventiraivel e cuntent che Razén haja lura er tutgà tar il chantun. Be da pensar tge temp che la populaziun da Razén haja fatg tras dal 1803 fin il 1819 fetschia bunamain sgarschur, ha ditg Rathgeb. Er 200 onns suenter quel mument istoric ins dastgia esser losch sin ils abitants da Razén che hajan gè da patir fitg

ed en vair senn cumbatter da lez temp per la libertad. Il cusseglier guvernativ liberal ha lura er engrazià al comitè d'organiziun da la festa tschientenara per l'organiziun perfetga.

Oz enconuscent entras la funtauna

Il president communal da la vischnanca da da Razén, *Reto Loeffle*, el ha cunzunt tematisà l'importanza da Razén avant 200 onns e lura er la muntada per ina regiun d'appartegnar a l'imperi austriac. En Svizra ins cunascheva Razén cun esser ina part da l'imperi austriac. Oz 200 onns pli tard conuschan ils Svizzers Razén pervia da la funtauna e pervia da l'aua minerala. Cussegliera naziunala *Magdalena Martullo*, er ella è vegnida a pled e cunzunt dà in sguard en l'istorgia dal chastè. Suenter ils blers pleds han lura las uniuns e scocietads da Razén e da las vischnancas vischinas dà a la festa blera vita cun chant e musica.



Star en parada per ils blers giasts envidads.